

**Dyddiad:** 12 Mawrth 2003  
**Amser:** 9.00 – 12.30  
**Lleoliad:** Cynulliad Cenedlaethol Cymru

## **Y PWYLLGOR DIWYLLIANT**

### **ADRODDIAD AR Y PEDAIR BLYNEDD GYNTAF: 1999 - 2003**

#### **RHAGARWEINIAD**

- 1 Cyn llunio Cytundeb Partneriaeth Cyntaf Cynulliad Cenedlaethol Cymru ar 6 Hydref 2000 roedd materion diwylliannol yn rhan o gylch gwaith y Pwyllgor Addysg a Hyfforddiant Ôl-16 (Y Pwyllgor Ôl-16). Bydd yr adroddiad hwn yn rhoi crynodeb o waith y pwyllgor hwnnw yn ogystal â gwaith y Pwyllgor Diwylliant a etifeddodd y cyfrifoldeb am faterion diwylliannol.

#### **Y PWYLLGOR ADDYSG A HYFFORDDIANT ÔL-16**

- 2 Roedd cylch gorchwyl y Pwyllgor yn adlewyrchu cylch gorchwyl y Gweinidog Addysg a Hyfforddiant Ôl-16 bryd hynny, sef Tom Middlehurst. Roedd y cyfrifoldebau yn ymestyn o addysg uwch ac addysg bellach, i hyfforddiant, diwylliant, chwaraeon a hamdden a'r Gymraeg. Roedd y portffolio hefyd yn goruchwyllo naw Corff Cyhoeddus a Noddir gan y Cynulliad (ASPBs).
- 3 Yn ystod ei oes cwblhaodd y Pwyllgor adolygiad o argymhellion y Cynllun Gweithredu Addysg a Hyfforddiant. Cymeradwyodd hefyd gynnyg y Gweithgor Addysg a Hyfforddiant (ETAG) i sefydlu Gyrfa Cymru a Chyngor Cenedlaethol Cymru dros Addysg a Hyfforddiant (ELWa). Cymeradwywyd adroddiad y Pwyllgor yn y Cyfarfod Llawn ym mis Chwefror 2000. Mae'r ddau gorff hwn bellach yn gwbl weithredol.
- 4 Cwblhaodd y Pwyllgor adolygiad cryno o sgôp a gweithgareddau Llyfrgell Genedlaethol Cymru. Cynhaliwyd ymgynghoriad eang a chafwyd sawl awrgymhelliad adeiladol ar gyfer gwella, a mynegodd y Pwyllgor y rhain mewn llythyr at Lyfrgellydd y Llyfrgell Genedlaethol.
- 5 Roedd y Pwyllgor hefyd wedi cydweithio'n agos gyda Bwrdd yr Iaith Gymraeg ac wedi cymeradwyo'n ffurfiol bapur y Bwrdd a oedd yn nodi ei weledigaeth ar gyfer dyfodol yr iaith. Hefyd enwebwyd tri aelod o'r Pwyllgor i ymuno â gweithgor o swyddogion er mwyn helpu i lunio Cynllun Iaith Gymraeg ar gyfer y Cynulliad.
- 6 Un o'r gweithgareddau olaf i'r Pwyllgor ei gyflawni cyn iddo gael ei ddiddymu oedd cyhoeddi fersiwn derfynol ei ddogfen helaeth ar y celfyddydau a diwylliant yng Nghymru, sef 'Diwylliant Cytûn'. Roedd yr

## DRAFFT

adroddiad yn ffrwyth chwe mis o ymgynghori ac roedd yn cynnwys dros gant o argymhellion. Etifeddodd y Pwyllgor Diwylliant yr adroddiad, ond ni wnaeth fabwysiadu ei argymhellion yn ffurfiol. Croesawodd aelodau'r pwyllgor lawer o argymhellion yr adroddiad, er y mynegwyd hefyd bryderon ynghylch rhai agweddau ar yr adroddiad.

### Y PWYLLGOR DIWYLLIANT

#### Cychwyn

- 7 Cynhaliodd y Pwyllgor ei gyfarfod cyntaf ar 15 Tachwedd 2000 ar ôl diddymu'r pwyllgor blaenorol. Etifeddodd gylch gwaith eang a seiliwyd ar bortffolio'r Gweinidog newydd dros Ddiwylliant, Chwaraeon a'r Gymraeg, Jenny Randerson.
- 8 Mae'r adroddiad hwn yn rhoi crynodeb o'n gweithgareddau o fis Tachwedd 2000 hyd yma. Gellir darllen copïau o adroddiadau, agendâu, papurau, cofnodion a thrawsgrifiadau ein cyfarfodydd ar wefan y Cynulliad Cenedlaethol.(1)

#### Aelodaeth

- 9 Dyma aelodau'r Pwyllgor ar hyn o bryd: Rhodri Glyn Thomas (Cadeirydd), Jenny Randerson (y Gweinidog dros Ddiwylliant, Chwaraeon a'r Gymraeg), Lorraine Barrett, Rosemary Butler, Delyth Evans, Alison Halford, Glyn Davies, Owen John Thomas, a Dafydd Wigley.
- 10 Newidiodd aelodaeth y Pwyllgor sawl gwaith yn ystod ei oes:
  - Cymerodd Dafydd Wigley le Gareth Jones ar 22 Mai 2001
  - Cymerodd Glyn Davies le Jonathan Morgan ar 20 Tachwedd 2001.

#### Cylch Gwaith a Chyfrifoldebau

- 11 Mae cylch gwaith y Pwyllgor yn adlewyrchu cylch gwaith Jenny Randerson, Gweinidog y Cynulliad dros Ddiwylliant, Chwaraeon a'r Gymraeg. Mae'n cynnwys y celfyddydau a diwylliant, chwaraeon a hamdden, y Gymraeg ac amgueddfeydd a llyfrgelloedd yn ogystal â chyfrifoldeb am oruchwylio naw corff cyhoeddus sy'n cael eu noddi gan y Cynulliad (APSBs) neu sy'n cael cymorth grant.
- 12 Nodir cyfrifoldebau'r pwyllgorau pwnc yn Rheol Sefydlog 9 (gweler Atodiad 1).

## **Blaenoriaethau**

13 Mae'r Pwyllgor wedi rhestru'r blaenoriaethau ymhlith ei gyfrifoldebau. Mae rhaglen waith y Pwyllgor yn cysylltu blaenoriaethau'r Pwyllgor â'r targedau a nodir yn strategaeth 'Cynllun i Gymru' Llywodraeth Cynulliad Cymru. Mae'r Pwyllgor wedi datblygu ffordd strategol o weithio, gan ganolbwyntio'n fanwl ar nifer bychain o faterion a flaenoriaethwyd. Ymysg pethau eraill mae wedi cynnal adolygiadau polisi pwysig o'r Gymraeg a chwaraeon.

## **Ein Gwaith a'r Hyn a Gyflawnwyd Hyd Yma**

14 Rydym wedi ymrwymo i'w gwneud yn haws i bobl Cymru weld ein trafodion. At y perwyl hwn rydym wedi cynnal cyfarfodydd yng Nghaerdydd, Aberystwyth, Dinbych, Casnewydd, Pontyberem, Pontypridd ac Abertawe.

15 Mae'r Pwyllgor wedi cyfarfod 49 gwaith. Dyma'n priif gyraeddiadau:

## **Datblygu Polisi – Rheol Sefydlog 9.7(i)**

### **Adolygiad Polisi o'r Iaith Gymraeg**

16 Etifeddodd y Pwyllgor gais gan y Cyfarfod Llawn i gynnal adolygiad cynhwysfawr o'r iaith Gymraeg. Gwnaethom fabwysiadu cylch gorchwyl a oedd yn ceisio diffinio'n fanylach amcan y Cynulliad Cenedlaethol i greu Cymru ddwyieithog, ac awgrymu strategaeth bendant o gamau i'w cymryd er mwyn cyflawni'r nod hwnnw. Yna fe benderfynodd y Pwyllgor wahodd y Pwyllgor Addysg a Dysgu Gydol Oes i asesu'r agenda dysgu gydol oes yn ei chyfanrwydd ac mewn modd holistig - o'r blynyddoedd cynnar i addysg i oedolion.

17 Dyma'r tro cyntaf i ddau o bwyllgorau pwnc y Cynulliad gynnal adolygiad ar y cyd. Lansiodd adroddiad '*Ein Hiaith: Ei Dyfodol*' (2) ac fe'i cyflwynwyd gerbron y Cyfarfod Llawn ar 9 Gorffennaf 2002. Hefyd fe gynhaliodd y Pwyllgorau dair sesiwn holi ac ateb lwyddiannus ynghylch yr adroddiad yn ystod wythnos yr Eisteddfod Genedlaethol yn Nhyddewi, Sir Benfro.

18 Roedd yr adolygiad yn flwyddyn o hyd ac yn ystod y cyfnod hwnnw daeth 175 cyflwyniad ysgrifenedig i law, clywsom 54 cyflwyniad ar lafar a chynhaliwyd chwe sioe deithiol ledled Cymru. Gwnaeth pedwar Pwyllgor Rhanbarth y Cynulliad Cenedlaethol hefyd gynnal sesiynau ymgynghori ar yr adolygiad, ac fe'i trafodwyd gan bron pob un o'r pwyllgorau pwnc eraill.

19 Mae'r Pwyllgor hefyd yn croesawu cefnogaeth Llywodraeth Cynulliad Cymru wrth fabwysiadu gweledigaeth y Pwyllgor o 'Gymru Ddwylieithog'.

20 Yn ddiweddar, mae Llywodraeth Cynulliad Cymru wedi cyhoeddi cynllun gweithredu '*laith Pawb*' sy'n ymgorffori nifer o brif argymhellion y Pwyllgor. Mae hyn wedi arwain at sicrhau bod llawer o gyllid ychwanegol ar gael i Fwrdd yr Iaith Gymraeg ac mewn meysydd fel prosiect Twf, y Mentrau Iaith, cynlluniau gweithredu lleol a mentrau eraill sydd wedi eu hanelu at gynyddu'r defnydd o'r Gymraeg.

### **Gweithgareddau eraill sy'n ymwneud â'r Gymraeg**

21 Mae'r Pwyllgor wedi cyfrannu cryn dipyn at Gynllun Iaith Gymraeg Llywodraeth Cynulliad Cymru. Enwebwyd tri aelod o'r Pwyllgor (Owen John Thomas, Rosemary Butler a Jenny Randerson) i ymuno â gweithgor o swyddogion i lunio'r Cynllun. Bu'r Pwyllgor yn ystyried y cynllun drafft ym mis Gorffennaf 2001 a chymeradwywyd y cynllun terfynol ym mis Hydref 2002.

### **Adolygiad Polisi ar Gymryd Rhan Mewn Chwaraeon**

22 Cychwynnodd y Pwyllgor ei adolygiad polisi diwethaf ym mis Gorffennaf 2002. Diben yr adolygiad oedd edrych ar nifer y bobl sy'n cymryd rhan mewn chwaraeon yng Nghymru a gweld sut y gellid eu cynyddu. Ystyriwyd yn benodol y rhwystrau i gymryd rhan, seilwaith a chyfleusterau, a chwaraeon elît.

23 Mae'r Pwyllgor wedi cynnal ymgynghoriad helaeth ac wedi derbyn nifer o ymatebion yn ogystal â chyflwyniadau llafar. Mae ystod eang o sectorau a chyrff sy'n ymwneud â darparu chwaraeon wedi cyfrannu, yn eu plith Cyngor Chwaraeon Cymru, cyrff llywodraethu chwaraeon, awdurdodau lleol, y sector preifat a chyrff gwirfoddol.

24 Bwriedir i adroddiad y Pwyllgor fod yn sail i ddadl yn y Cyfarfod Llawn ar ddydd Mawrth 1 Ebrill 2003.

### **Adolygiad o Wariant a Gweinyddiaeth – Rheol Sefydlog 9.7 (ii)**

25 Bob mis mae'r Gweinidog wedi cyflwyno adroddiad gerbron y Pwyllgor er mwyn iddo graffu ar fentrau polisi, ymgynghoriadau, materion sy'n ymwneud â'r gyllideb a materion eraill. Roedd y Cadeirydd a'r Gweinidog yn trafod ac yn cytuno ar bynciau pob adroddiad ymlaen llaw, gan gymryd i ystyriaeth bynciau a awgrymwyd gan Aelodau'r Pwyllgor.

26 Mae diddordeb mawr gan y Pwyllgor mewn datblygu argymhellion adroddiad 'Diwylliant Cytûn'(3). Ymgynghorwyd yn gyson â'r Pwyllgor ar adeg llunio 'Strategaeth Ddiwylliant' Llywodraeth Cynulliad Cymru, a

## DRAFFT

dilynodd ei hynt o'r cynllun prosiect, i'r drafft, a'r cynllun gweithredu terfynol.

- 27 Hefyd, gofynnodd y Gweinidog dros Gyllid i'r Pwyllgor ystyried pa mor ymarferol oedd cynllun busnes diwygiedig Canolfan Mileniwm Cymru (CMC). Ym mis Mai 2001, cyfarfu'r Pwyllgor â chynrychiolwyr o'r CMC a phenderfynodd ei fod yn fodlon â chynigion y Ganolfan ac y dylai'r prosiect fynd yn ei flaen.
- 28 Mae'r Pwyllgor wedi derbyn adroddiadau chwe-misol gan Weinidog y Cynulliad ar hynt y Fargen Newydd ac mae wedi cyfarfod â chynrychiolwyr Tasglu'r Fargen Newydd yn y gorffennol.

### **Cyrff Cyhoeddus a Noddir gan y Cynulliad (ASPBs)/Cyrff Cyhoeddus sy'n Derbynn Cymorth Grant– *Rheol Sefydlog 9.7(iii)***

29 Mae portffolio'r Pwyllgor yn cynnwys pum ASPB gweithredol:

- Cyngor Celfyddydau Cymru;
- Cyngor Chwaraeon Cymru;
- Llyfrgell Genedlaethol Cymru;
- Amgueddfeydd ac Orielau Cenedlaethol Cymru; a
- Bwrdd yr Iaith Gymraeg

30 Mae'r portffolio hefyd yn cynnwys tri chorff cyhoeddus arall y mae'r Cynulliad yn eu hariannu:

- Y Cyngor Amgueddfeydd yng Nghymru
- Cyngor Llyfrau Cymru
- Canolfan Mileniwm Cymru

31 Mae'r portffolio yn cynnwys dau ASPB ymgynghorol

- Cyngor Gwasanaethau Gwybodaeth a Llyfrgelloedd (Cymru)
- Y Pwyllgor Ymgynghorol Enwau Lleodedd

32 Heblaw am y ddau ASPB ymgynghorol mae'r holl gyrff a enwir uchod wedi ymddangos gerbron y Pwyllgor yn ystod y ddwy flynedd a hanner diwethaf. Mae'r Pwyllgor wedi cynnal sesiynau gwerthfawr i drafod adroddiadau blynyddol, cynlluniau corfforaethol a chamau'r adolygiadau pum mlynedd.

33 Hefyd, cynhaliodd y Pwyllgor sesiynau gwerthfawr gydag Amgueddfeydd ac Orielau Cenedlaethol Cymru ynghylch ei ymgynghoriad ar 'Arddangos Celf'.

34 Mae'r cyrff hyn hefyd wedi gweithio'n agos â'r Pwyllgor gan ddarparu tystiolaeth a chanllawiau yn ystod ein hadolygiadau polisi yn ogystal â darparu adroddiadau ar hynt yr adolygiadau eraill y maent yn eu cynnal.

35 Mae'r Pwyllgor yn ddiolchgar am gefnogaeth a chyngor y cyrff hyn ac yn edrych ymlaen at gydweithio'n agos â hwy yn y dyfodol.

**Deddfwriaeth – Rheol Sefydlog 9.8 (i)**

36 Roedd llawer o waith cynnar y Pwyllgor yn canolbwyntio ar gyhoeddi'r Papur Gwyn ar Gyfathrebu gan yr Adran Diwylliant, y Cyfryngau a Chwaraeon, sef 'A New Future for Communications' a'i oblygiadau i Gymru. Derbyniodd y Pwyllgor dystiolaeth lafar ac ysgrifenedig gan BBC Cymru, S4C, HTV Cymru a'r Comisiwn Teledu Annibynnol. Llwyddodd y sesiynau hyn i lywio syniadau'r Pwyllgor yn y maes hwn a chyfrannu at ymateb Gweinidog y Cynulliad i'r Papur Gwyn.

37 Yn dilyn hyn, cyhoeddwyd Mesur Cyfathrebu drafft ym mis Mai 2002, ac ar ôl dadl yn y Pwyllgor, y Cyfarfod Llawn ac ymgynghoriad eang, cyflwynodd y Cynulliad ymateb ffurfiol i'r ymgynghoriad cyhoeddus. Mae'r Pwyllgor wedi cynnal sesiwn i nodi ymateb Llywodraeth y DU i argymhellion y Cynulliad.

38 Ym mis Chwefror 2001 bu'r Pwyllgor yn ystyried cynnig y Gweinidog i gynnwys 25 corff yn is-ddeddfwriaeth y Cynulliad dan Adran 6(1)(o) o Ddeddf yr Iaith Gymraeg 1993. Mae adran 6 y Ddeddf yn rhestru cyrff a chategoriâu o gyrff y gall Bwrdd yr Iaith Gymraeg eu hysbysu'n ffurfiol bod rhaid iddynt baratoi Cynllun Iaith Gymraeg.

**Y Gyllideb – Rheol Sefydlog 9.8 (ii)**

39 O dan y Rheolau Sefydlog gwahoddir pob pwyllgor pwnc i roi cyngor i Gabinet y Cynulliad ar feysydd perthnasol ac ar faterion sy'n ymwneud â dyrannu cyllideb.

40 Bob blwyddyn ariannol mae'r Gweinidog dros Gyllid wedi gwahodd y Pwyllgor i gyflwyno ei sylwadau ar flaenoriaethau ar gyfer gwariant y Cynulliad ar faterion diwylliannol yn y tair blynedd sydd i ddod, neu ar gyfer cyfnod y mae'r Gweinidog dros Gyllid yn ei ystyried yn briodol.

41 Bob haf nododd y Gweinidog dros Ddiwylliant, Chwaraeon a'r Gymraeg y blaenoriaethau ar gyfer y gyllideb er mwyn i'r Pwyllgor roi sylwadau arnynt, ac roeddem ni'n cyflwyno sylwadau ar y gyllideb ddrafft ddilynol yn nhymor yr hydref bob blwyddyn. Bu'r Pwyllgor yn trafod rownd gynllunio'r gyllideb ar 23 Hydref 2002, a chroesawodd y cynnydd cyffredinol yn y ddarpariaeth ar gyfer portffolio'r Gweinidog dros Ddiwylliant, a'r cynnydd yn y cyllid ar gyfer y Gymraeg.

42 Serch hynny gofynnodd y Pwyllgor am wybodaeth fanylach ar rai agweddau ar y gyllideb, ac yn benodol ar y modd y defnyddir y ddarpariaeth Hyblygrwydd Diwedd Blwyddyn (EYF) a sut y bydd hyn yn

## DRAFFT

effeithio ar y ddarpariaeth gyffredinol ac ar sefyllfa ariannol yr Ardd Fotaneg Genedlaethol. Galwodd y Pwyllgor hefyd am fwy o gefnogaeth i gerddoriaeth draddodiadol. (4)

- 43 Yn y gorffennol mae'r Pwyllgor wedi cydweithio'n agos â'r Gweinidog dros Gyllid a'r Gweinidog dros Ddiwylliant, Chwaraeon a'r Gymraeg i sefydlu Cronfa Celfyddydau Cenedlaethol fel yr argymhellwyd yn 'Diwylliant Cytûn'.

### **Cyfle Cyfartal**

- 44 Mae'r Pwyllgor yn ymdrechu i hyrwyddo yr egwyddor o gyfle cyfartal i bawb tra'n cyflawni ei swyddogaethau a thra'n gwneud ei waith. Mae'r Pwyllgor yn awyddus iawn i sicrhau bod trafodaethau'n digwydd ar bob lefel o'r Cynulliad gyda grwpiau sy'n cynrychioli buddiannau'r lleiafrifoedd a phobl sy'n dioddef anfantais. Mae'r Pwyllgor yn ymgynghori'n rheolaidd â rhanddeiliaid allweddol yn y maes.

- 45 Mae'r Pwyllgor wedi dilyn yr egwyddorion hyn yn ei ddau adolygiad polisi. Pwysleisiodd y Pwyllgor yn ei adolygiad o'r iaith Gymraeg y dylid hyrwyddo cyfle cyfartal mewn perthynas â'r iaith er mwyn sicrhau bod gwasanaethau cyhoeddus a ddarperir ar gael i bobl yn eu hiaith ddewisedig. Wrth i'r Pwyllgor adolygu'r sefyllfa o ran y bobl sy'n cymryd rhan mewn chwaraeon ac ymarfer corfforol pennwyd rhwystrau i fynediad fel un o dair brif thema yr adolygiad ac archwilwyd ffactorau a oedd yn effeithio ar nifer y merched, y lleiafrifoedd ethnig a'r bobl anabl sy'n cymryd rhan.

- 46 Mae Llywodraeth Cynulliad Cymru ac yn arbennig Cyngor Celfyddydau Cymru wedi datblygu strategaethau amrywiaeth ddiwylliannol a chynlluniau cyllid mewn ymateb i argymhellion yn 'Diwylliant Cytun'.

### **Datblygu Cynaliadwy**

- 47 Mae'r Pwyllgor yn cefnogi ymrwymiad Cynulliad Cenedlaethol Cymru i hyrwyddo datblygiadau sy'n diwallu anghenion y presennol heb amharu ar allu cenedlaethau'r dyfodol i ddiwallu eu hanghenion eu hunain. Mae'r Pwyllgor wedi ceisio ystyried materion cymdeithasol, economaidd ac amgylcheddol wrth gyflawni ei holl swyddogaethau.

- 48 At y diben hwn mae'r Pwyllgor wedi monitro'n ofalus yr argymhelliad yn 'Diwylliant Cytun' y dylai fod yn ofynnol i Gyrrff Cyhoeddus ym maes diwylliant a Noddir gan y Cynulliad gysylltu eu cynlluniau strategol â chynlluniau adfywio cymunedol - ac y dylid ystyried gweithgareddau diwylliannol fel agwedd hanfodol ar raglenni adfywio. Yn ystod trafodaeth y Pwyllgor ynghylch yr iaith Gymraeg cydnabyddwyd bod datblygu cymunedau cynaliadwy yn flaenoriaeth allweddol. Cydnabyddodd y Pwyllgor nad oedd hyn yn gyfyngedig i gymunedau Cymraeg ac i gadarnleoedd.

**Cwynion – Rheol Sefydlog 9.8 (iii)**

49 Dan y rheolau sefydlog y mae'n ofynnol i'r Ysgrifennydd Parhaol sicrhau bod gweithdrefnau yn eu lle er mwyn cydnabod a chynnal ymchwiliad i'r cwynion yn erbyn y camau a gymerwyd gan y Cynulliad, neu unrhywbeth a hepgorwyd ganddo; a sicrhau bod yr achwynwyr yn cael gwybod am hynt yr ymchwiliadau ac yn cael ymateb, ac y dylid datrys y mater fel ag y mae'n briodol.

50 Hyd y n hyn nid oes unrhyw gwynion wedi dod cael ei cyfeirio ato'n.

**Penodiadau Cyhoeddus – Rheol Sefydlog 9.8 (iv)**

51 Ymgynghorwyd â'n henwebedigion ar gyfer penodiadau cyhoeddus ynghylch gwahanol benodiadau i gyrff cyhoeddus yn ystod y cyfnod adrodd (5). Byddant yn goruchwyllo yn fuan proses penodi Cadeirydd newydd ar gyfer Cyngor Celfyddydau Cymru a buont yn gysylltiedig yn ddiweddar â phrosesau penodi Amgueddfeydd ac Orielau Cenedlaethol Cymru, Bwrdd yr Iaith Gymraeg a Llyfrgell Genedlaethol Cymru.

**BLAENRAGLEN**

52 Etholir pwyllgorau pwnc newydd ar ôl etholiadau mis Mai 2003 a bydd rhaglen waith bresennol y Pwyllgor yn dod i ben. Serch hynny, efallai y byddai'r pwyllgor sy'n ein dilyn am ystyried y materion dilynol .....  
*[Papur etifeddiaeth i gael ei drafod yng nghyfarfod 26 Mawrth]*



## DRAFFT

<sup>1</sup> Gweler tudalennau'r Pwyllgor Diwylliant ar wefan y Cynulliad, sef <http://www.cymru.gov.uk/keypubassemculture/index.htm>

<sup>2</sup> Gweler <http://www.wales.gov.uk/keypubassemculture/content/welshlanguagereview/home-e.htm> am gopïau o'n hadroddiad (ISBN 0 7504 2946 1)

<sup>3</sup> Gweler [http://www.cymru.gov.uk/servlet/DissolvedCommittee?area\\_code=37D6AD0F00074C1F0000123400000000&module=dynamicpages](http://www.cymru.gov.uk/servlet/DissolvedCommittee?area_code=37D6AD0F00074C1F0000123400000000&module=dynamicpages) am gopïau o'n hadroddiad.

<sup>4</sup> Gweler tudalennau cyllideb a chynllunio strategol ar [www.cymru.gov.uk](http://www.cymru.gov.uk) am gopïau o'n hymatebion.

<sup>5</sup> Rhodri Glyn Thomas AC, Jenny Randerson AC a Rosemary Butler yw'r rhai a enwebwyd ar hyn o bryd.

## **CYFRIFOLDEBAU PWYLLGORAU PWNC**

Mae rheolau sefydlog 9.7 a 9.8 yn gosod allan cyfrifoldebau pwyllgorau pwnc.

### **Cyfrifoldebau**

#### 9.7 Bydd pob pwyllgor pwnc

- (i) yn cyfrannu at ddatblygu polisiâu'r Cynulliad o fewn y meysydd y mae'r Gweinidog perthnasol yn atebol i'r Cynulliad amdanynt;
- (ii) yn cadw llygad ar y gwariant a'r weinyddiaeth sy'n gysylltiedig â'u gweithredu; a
- (iii) yn cadw llygad ar waith cyflawni'r swyddogaethau cyhoeddus yn y meysydd hynny gan gyrrff cyhoeddus, gwirfoddol a phreifat.

#### 9.8 O fewn y meysydd perthnasol, bydd pob pwyllgor pwnc hefyd:

- (i) yn cynghori ar ddeddfwriaeth arfaethedig a fydd yn effeithio ar Gymru, gan gynnwys cyflawni ei swyddogaethau o dan reol sefydlog 22;
- (ii) yn rhoi cyngor i Gabinet y Cynulliad ar faterion sy'n ymwneud â dyrannu cyllideb y Cynulliad yn unol â rheol sefydlog 19;
- (iii) yn cyflawni ei swyddogaethau o dan reol sefydlog 21 (cŵynion);
- (iv) yn cyflawni unrhyw swyddogaethau a neilltuir iddo o dan y Cod Ymarfer ar Weithdrefn Penodiadau Cyhoeddus a wneir gan y Cynulliad o dan reol sefydlog 21; a
- (v) yn ystyried materion y bydd y Cynulliad yn eu cyfeirio ato o fewn ei feysydd.